

Акафист

Честному и Животворящему Кресту Господню

Кондак 1

О всеспасительный Кресте и всечестный,
тебе покланяемся вернии и величаем,
радующеся божественному твоему воздвижению:
но яко победы знамение и оружие непреоборимое,
огради и покрый твоею благодатию тебе вопиущия:
Радуйся, животворящий Кресте Господень.

Икос 1

Ангели с небесе невидимо окружают Крест живоносный в страсе, и
светоподательную благодать обильно подающа ныне верным видяще,
ужасаются и стоят вопиюще к нему сицевая:

Радуйся, Кресте, вселенная хранителю;
радуйся, Церкви прославление.
Радуйся, исцеления изобильно источай;
радуйся, пределы мира просвещаяй.
Радуйся, древо живоблагоуханное и чудес сокровище;
радуйся, пречудный благодатей подателю.
Радуйся, яко еси подножие божественное;
радуйся, яко положен был еси всем на поклонение.
Радуйся, чаше, нектара исполненная;
радуйся, светильниче горния светлости.
Радуйся, имже вся тварь благословляется;
радуйся, имже поклонение Творцу возсылается.
Радуйся, животворящий Кресте Господень.

Кондак 2

Видящи Елена в себе желание обрести Крест, глаголет царице
дерзновенно: всевожденное души твоей удобнейше моему тщанию является:
ищущи убо державнейшее ти победы знамение, яко глаголеши, зову: **Аллилуия**.

Икос 2

Разум неразумеваемый прежде царица разумевши, абие возопи к
служителем: из боку земли извлеши вскоре и подати Крест потщитесь, на
негоже возревши рече в страсе, обаче зовущи сице:

Радуйся, радости истинныя знамение;
радуйся, клятвы древния искупление.
Радуйся, сокровище, в земли завистию сокрываемое;
радуйся, явлейся звездами воображаемый.
Радуйся, Кресте четверолучеогненный и огнеобразный;
радуйся, лестнице высокоутвержденная, древле предувиденная.
Радуйся, ангелов тихообразное чудо;
радуйся, демонов многоплачевная язва.
Радуйся, красное слова сокровище;
радуйся, пламене прелести угашение.
Радуйся, предстателю неимущих;
радуйся, твердый наставниче благодетельных.
Радуйся, животворящий Кресте Господень.

Кондак 3

Сила древа крестнаго явися тогда ко уверению истинному всех, и безгласную и мертвую к животу возстави, и се бысть тогда страшное видение всем имеющим жати спасение, во еже пети сице: Аллилуия.

Икос 3

Имущи Елена оружие непобедимое, востече к сыну своему, той же абие возрадовася премного, познав Крест преславный, и в веселии душевнем вопияше к нему сицевая:

Радуйся, Кресте, света приятелище;
радуйся, Кресте, жизни сокровище.
Радуйся, дарований духовных подателю;
радуйся, мореплавателем необуреваемое пристанище.
Радуйся, трапезо, яко жертву носящая Христа;
радуйся, розго, грозд имущая, вино таинственное источающий.
Радуйся, яко скиптры царей охраняеши;
радуйся, яко главы змиев сокрушаеши.
Радуйся, светлое веры знамение;
радуйся, всего мира избавление.
Радуйся, смертным Божие благословение;
радуйся, к Богу о смертных ходатайство.
Радуйся, животворящий Кресте Господень.

Кондак 4

Ревность внутрь божественную Елена приемши, взыска и обрете со тщанием в земли Крест сокрываемый, и явившийся на небеси цареви, егоже возвыси, и видевшие людие верою рекоша: Аллилуия.

Икос 4

Солнцезрачен явися Крест в мире, и вси просвещения исполньшеса и притекше яко ко звезде, зрят сего, якоже добрых вино, рукама освященныма воздвижена, егоже поюще реша:

Радуйся, заре мысленнаго солнца;
радуйся, источниче неистоцимаго мира.
Радуйся, Адама и Евы воззвание;
радуйся, князей адовых умерщвление.
Радуйся, яко воздвигаемый ныне нас совоздвигаеши;
радуйся, яко покланяемый души наша освящаеши.
Радуйся, апостолов миру проповеданная славо;
радуйся, страстотерпцев благодатнейшая крепосте.
Радуйся, Кресте, неверных обличение;
радуйся, верных человеков похвало.
Радуйся, имже низвержеса ад;
радуйся, имже возсия благодать.
Радуйся, животворящий Кресте Господень.

Кондак 5

Богодарованное древо увидевше, вси да прибегнем ныне к покрову его, держаще сие яко оружие, обратим в бегство полки врагов, и коснувшеса устнами подножия Неприкосновеннаго, воззовем Ему: Аллилуия.

Икос 5

Виде свет с небесе Константин Великий, показующий Креста знамение звездами, имже и побеждая врагов множество, потщася Древо явити и возопити к нему сицевая:

Радуйся, неизреченнаго совета исполнение;
радуйся, рог людей благочестивых.
Радуйся, полки врагов в бегство обращаай;
радуйся, демоны яко пламя сожигаяй.
Радуйся, небесный скиптре вернаго царя;
радуйся, непобедимая победо христоролюбиваго воинства.
Радуйся, гордыню вражию ниспровергаяй;

радуйся, о душах человеческих попечение прилагаяй.
Радуйся, от многих зол защищение;
радуйся, великих благ награждение.
Радуйся, имже христоносцы възиграют;
радуйся, имже распинателие рыдают.
Радуйся, животворящий Кресте Господень.

Кондак 6

Лествица, до небес досягающая, Крест Господень бысть, вся возводя от земли к высоте небесней, с лики ангельскими сообитати всегда, оставльшия ныне сущая яко не сущая, и ведущия пети: Аллилуия.

Икос 6

Возсияв свет всем, Спасе, сущим во аде, просветил еси долу лежащая: вратницы же адовы, зари не терпяще твоя, яко мертви падоша. избавльшиися же сих, ныне зряще Крест вопиют:

Радуйся, умерших воскресение;
радуйся, плачущих утешение.
Радуйся, адовых хранилищ истощение;
радуйся, райския сладости вкушение.
Радуйся, жезле, воинство египетское потопивый;
радуйся, паки израильския люди напоивый.
Радуйся, одушевленное древо, разбойника спасение;
радуйся, шипок благовонный, благочестивых благоухание.
Радуйся, пище алчущих духовно;
радуйся, печате, юже прияша человецы.
Радуйся, Кресте, таинств отвержение.
радуйся, источаяй божественныя струи.
Радуйся, животворящий Кресте Господень.

Кондак 7

Хотящу Моисеови избавити люди многострадальныя от гонителя, дан был еси ему яко жезл, но познался от него якоже Божие знамение, сего ради изумлен бысть той могуществом Креста Господня и возопи: Аллилуия.

Икос 7

Закон давый иногда боговидцу на Синаи, пригвожден бысть волею ко Кресту за люди беззаконныя, и упраздни закона клятву древнюю, да вси мы, видяще ныне Креста силу, воззовем ему:

Радуйся, падших человек востание;

радуйся, миру сему покланяющихся падение.
Радуйся, воскресения Христова прославление;
радуйся, монашествующих божественное услаждение.
Радуйся, древо благосеннолиственное, имже покрываются вернии;
радуйся, древо, пророки глаголанное, на земли насажденное.
Радуйся, царствию на враги поможение;
радуйся, христоименитому жительству державное предстательство.
Радуйся, Судии Праведнаго явление;
радуйся, человекосогрешающих осуждение.
Радуйся, Кресте, сирот заступниче;
радуйся, Кресте, нищих богатителю.
Радуйся, животворящий Кресте Господень.

Кондак 8

Странное чудо видевши, странное житие поживем, ум на небо
возвышающе: сего бо ради на Кресте Христос пригвоздися и плотию пострада,
хотя привлещи к высоте Ему вопиющия: Аллилуия.

Икос 8

Весь прииде с высоты, Бог сый, единое предвечное Слово, и рождейся от
Девы Матере, и явлейся миру смирен Человек, Крест восприемый, оживи ему
вопиющия:

Радуйся, Кресте, оружие мира;
радуйся, путешествующим ограждение.
Радуйся, спасающимся премудрость и утверждение;
радуйся, погибающим безумие и сокрушение.
Радуйся, благоплодное, бессмертное и живоносное произрастение;
радуйся, цвете, процветший наше спасение.
Радуйся, яко сущая на земли с горними соединяеши;
радуйся, яко сердца дольних просвещаеши.
Радуйся, имже тление изгнася;
радуйся, имже печаль исчезе.
Радуйся, неизмеримое блаженство добрых;
радуйся, многоименная славо верных.
Радуйся, животворящий Кресте Господень.

Кондак 9

Паде демонов всескверный полк, и род распинателей устыдеса, видяще ныне Крест от всех с любовью покланяемый, присно же источающий исцеления вопиющим: Аллилуия.

Икос 9

Потоцы престаша помышлений злославных, распеншуся ти, Христе, на древе: недоумевают бо, еже како и Крест претерпел еси, и тления избежал еси. мы же воскресение славяще возопиим:

Радуйся, премудрости Божия вышото;
радуйся, промышления его глубино.
Радуйся, безумным суесловцем неведомый;
радуйся, неразумных прорицателей погубление.
Радуйся, яко воскресение Христово являеши;
радуйся, яко страдания Его обновляеши.
Радуйся, преступление первозданных разрешивый;
радуйся, рая входы отверзый.
Радуйся, Кресте, всеми почитаемый;
радуйся, языком неверным сопротивниче.
Радуйся, Кресте, недугующим врачу;
радуйся, присный вопиющим помощниче.
Радуйся, животворящий Кресте Господень.

Кондак 10

Спасти хотя мир, иже мира Украситель, сниде к нему неизреченно, и Крест претерпе, Бог сый: нас ради вся яже по нам приемлет, темже и избавлей нас, слышит от всех: Аллилуия.

Икос 10

Стену нерушимую божественную вселенней почитаем тя, живоносный Кресте, зане соделавый тя Творец неба и земли руце на тебе распростре, о страннаго слышания! научив всех возглашати:

Радуйся, основание благочестия;
радуйся, победо наследствующих.
Радуйся, мысленнаго Амалика прогоняяй;
радуйся, рукама Иаковлевыми прообразованный.
Радуйся, ты бо возобразил еси древнейшия сени;
радуйся, ты бо исполнил еси пророкоглаголанная гласы.
Радуйся, Спасителя всех носивый;
радуйся, губителя душ упразднивый.

Радуйся, имже со ангелы соединихомся;
радуйся, егоже ради светом озарихомся.
Радуйся, яко почитающе покланяемся тебе;
радуйся, яко восклицающе взываем к тебе:
Радуйся, животворящий Кресте Господень.

Кондак 11

Пение всякое у малается, последовати хотящее изобилию многому чудес твоих: ибо похвал множество аще принесем ти, о Кресте честный, ничтоже совершаем достойно, яже дал еси нам: но убо возопиим Богу: Аллилуия.

Икос 11

Светоподательную зарю сущим во тме дарует Крест живодаровательный сей: невещественный бо прият свет, и к разуму божественному наставляет вся, возвышает же, ныне возвышаемь, ум наш воспевати сия:

Радуйся, светило, сущим во тме сияющее;
радуйся, звездо, мир озаряющая.
Радуйся, молние, христуубийцы ослепляющая;
радуйся, громе, неверныя ужасаяй.
Радуйся, яко лики православных украсил еси;
радуйся, яко требища идольская сокрушил еси.
Радуйся, егоже образ с небесе явился;
радуйся, егоже благодатию лукавство прогнася.
Радуйся, умерщвление плоти знаменуй;
радуйся, востание страстей убиваяй.
Радуйся, на немже Христос распяся;
радуйся, имже весь мир спасеся.
Радуйся, животворящий Кресте Господень.

Кондак 12

Благодать даровати человеком восхотев, Христос руце на Кресте распростре, призываяй вся языки, и дарует Царство Небесное всем поющим ему песнь достойно, и с верою вопиющим: Аллилуия.

Икос 12

Поюще песнь сию, Крест восхваляем с любовию, яко древо Господне одушевленное: на нем бо распенся плотию Владычествуй горними силами, освяти ны, прослави и научи вопити тому сицевая:

Радуйся, Кресте, мысленный мечу;
радуйся, святых святое созерцание.

Радуйся, пророков и праведных предвозвещение;
радуйся, Христово светоносное воинствование.
Радуйся, доброто и венче царей благочестивых;
радуйся, державо и крепосте иереев благоговейных.
Радуйся, истины украшение благославнейшее;
радуйся, спасения пристанище благоприятнейшее.
Радуйся, всех светлое удобрение;
радуйся, сынов неверных прогнание.
Радуйся, света непорочнаго светильниче;
радуйся, души моя радование.
Радуйся, животворящий Кресте Господень.

Кондак 13

О всепетое Древо, носившее всех святых святейшее Слово! Силою на тебе Распятаго от всякия избави напасти всех, и вечныя изми муки Тому вопиющия: Аллилуия.

Этот кондак читается трижды, затем снова 1-й икос и 1-й кондак.

Молитва

Да воскреснет Бог, и расточатся врази Его, и да бежат от лица Его ненавидящии Его. Яко исчезает дым, да исчезнут; яко тает воск от лица огня, тако да погибнут беси от лица любящих Бога, и знаменующихся крестным знамением, и в веселии глаголющих: радуйся, пречестный и животворящий Кресте Господень, прогоняяй бесы силою на тебе пропятаго Господа нашего Иисуса Христа, во ад сшедшаго и поправшаго силу диаволу, и даровавшаго нам тебе, Крест Свой честный, на прогнание всякаго супостата. О пречестный и животворящий Кресте Господень, помогай ми со святою Госпожею Девею Богородицею, и со всеми святыми во веки. Аминь.